

Poeti Joisti





PAISI MEU
di *Alberto Criscenti*
Buseto Palizzolo (TP)

Puru si resti sempri ddu paisi
di quattru casi jittati a la rinfusa¹,
comu ‘n amanti, quannu pigghia ‘mprisi,
stu coriceddu meu ti fa li fusa!
...E la to genti, stirpi di Muntisi²,
di st’Agru³ ammintuata chiù giniusa,
nun havi griddi ‘n testa, né pritisi,
cu cori ‘n manu, sempri rispittusa!

E poi ssi nomi: leggiu nta la Stòria
chi l’Arabi⁴ d’ ‘u primu ti ‘nsitaru,
pi l’autru, s’ ‘un sbagghia la memòria,
lu plausu ci spetta a un Capitanu⁵
chi di ddà supra⁶ a valli lu mannaru
pi méttiri “Giustizia”...nta stu chianu!

¹ Buseto Palizzolo è costituito da diversi agglomerati sparsi.

² Del Monte San Giuliano, ora Erice.

³ L’Agro Ericino, comprendente le antiche frazioni di Erice, ora comuni autonomi: Buseto Palizzolo, Custonaci, San Vito Lo Capo, Valderice.

⁴ Buseto deriva da Basith e, probabilmente, costituisce una volgarizzazione di Basita, in arabo “terra”.

⁵ Francesco Palizzolo, Capitano di Giustizia e Regio Cavaliere che, proveniente da Erice, venne ad abitare a Buseto nel XVI secolo.

⁶ Dalla vetta (Monte San Giuliano).



JÒ OPPURU EU?
di *Dino Altese*
Erice Casa Santa (TP)

Cu parra e scrivi giustu sicilianu
avi cosi di cerniri e munnari,
cu ascuta e leggi, puru si luntanu,
avi a capiri senza spacenziari.

Stu me cuncettu nun mi pari stranu,
vali lu scrittu chiù di lu parrari,
ma, si a qualcunu poi ci pari arcanu,
lu zoccu ha fattu lu pò sempri fari.

Dialettu o lingua, si c'è püisia,
ognunu scrivi zoccu ci cummeni,
o zoccu cerni la so fantasia.

Si scrivu jò, jè, iu, eu o comu veni,
cunta l'amuri, senza gilusìa,
doppu tuttu, si ni vulemu beni.



AMURI PI LA PUISIA
di *Francesco Savalli*
Buseto Palizzolo (TP)

Amu la püisìa cu veru amuri
picchè la menti mi fa travagghiari;
stu beni mi lu detti lu Signuri
e senza fari nenti ‘un pozzu stari.

Quannu chi pensu sunnu rosi e ciuri,
la menti mi fa sempri a macinari,
allura mi smiruddu tutti l’uri
pi la me püisìa putiri fari.

Quannu la Musa mi fa cumpagnìa,
mi duna l’estru e puru la lustrura,
pi chissu vogghiu a Idda a latu a mia!

Siddu la Musa ‘un c’è sunnu dulura!
Basta sulu chi c’è la fantasìa
eu scrivu sempri ‘nsina a quannu scura.



LU NOSTRU DIALETTU
di *Giuseppe Morfino Piccione*
Custonaci (TP)

Lu nostru dialettu sicilianu
l'avissi a 'n signari 'u profissuri;
pigghiassi certamenti chiù valuri,
inveci 'u parla sulu lu viddanu.
Sturiannu lu spagnolu e lu francisi
l'origini si perdi d' 'u paisi!

È veru beddu stu nostru dialettu,
puru s' 'a nostra lingua è l'italianu!
Stu nostru linguaggiu sicilianu
sintiti, sona comu 'n friscalettu!
È l'assitu di li nostri antinati,
fa parti d' 'u passatu e nubiltati.

È musica chi nesci di la vacca!
'N puisìa l'avemu sempri a diclamari!
È 'mpastatu di terra, suli e mari:
lu surriseddu nostru abbunna e sbucca!
Nta stu parlari c'esti sintimentu
e lu cori ni batti chiù cuntentu!



LU SULI
di *Giuseppe Vultaggio*
Trapani (TP)

E' l'arba e brilla e scinni l'acquazzina,
l'aceddi 'n celu parinu sculpiti,
la scuma di lu mari supra 'a rina,
pari chi fa carizzi sapuriti.
'Na matri e un figghiu, supra 'na "panchina",
apprezzanu cu l'occhi sbalurditi,
soccu succeri 'n terra ogni matina,
tinennusi abbrazzati comu ziti !

Si virinu l'azzurru di lu celu
e poi lu sulì, gran protagonista,
dui nuvulicchi chi fannu di velu,
mentri lu ventu fa di grapi pista.
Sboccia ogni ciuri, supra lu so stelu
e matri e figghiu fannu la provvista,
di stu ritrattu fattu supra un telu,
da li priggiate manu di 'n "Artista"!

Poi jocanu filìci tra li ciuri,
scurdannusi d'“u tempu chi firria,
la matri metti tuttu lu so amuri,
lu figghiu porta ‘nveci l’allegria;
la zagara svapùra lu so oduri,
li cicaledi fannu l’armunia,
‘n ariddu, ‘n mezzu, fa lu diritturi
e tutti ‘nsèmi fannu ‘na puisia !

Si chiuri lu cuncertu a la scurata,
mentri la luna già si spècchia a mari;
lu sulì è prontu pi la so calata,
lu picciriddu ‘un voli chiù jucari...
“picchè nun resta ancora ‘na rancata?”
dici a so matri: “tu lu poi prijari?
Idda l’abbrazza e doppu ‘na vasata,
rispunni: “torna...tu nun ti scantari!”